

四庫全書

集部

欽定四庫全書

集部

抱犢山房集卷六

四至

詳校官庶吉士

臣汪彥博

助教臣常循覆勘

總校官編修

臣王燕緒

校對官助教

臣卜維吉

謄錄監生

臣戴瑛

欽定四庫全書

抱犢山房集卷四

錫山

嵇永仁 撰

雜詩

夜泛西湖

日暮歌船歌澄流杳若空倒峰湖氣上孤櫂月明中聽
曲憐司馬題詩憶遠公鄂王蹟畔樹一夜起秋風

韜光寺次香山原韻

竹路循危磴神仙此是家池流千古雪山放九秋花撥
草尋苔碣支筇觸筍芽因僧聊借憩還試早春茶

少年行

年少嫻弓矢從戎久不歸一朝返故里夾道生光輝馬
勒裝金軸魚腸挂鐵衣還看舊相識白首尚寒微

渡錢塘

清曉上江船江空細雨懸落潮沙氣暖擊楫鼓聲連鳥
雀衝林起魚蝦出網鮮萬峰纔透色入望忽雲烟

越女

越女習勤苦家家盡飼蠶攜筐來道左采葉過城南朝
露常多畏春風獨抱慚趙王殊不識妾意比澄潭

石門

落日石門近離懷苦未安人烟爭入浦夕鳥倦啼寒歷
歷吳江盡悠悠歲序闌不知霜月下猶作故鄉看

曹秋嶽司農倦圃

愛客司農性花開不閉闌構亭秋水曲把酒夕陽間人

事無心絕嘯歌恒自閒南湖有鷗鳥應識謝東山

家爾遐兄招過嚴陵

一自之官去翻令會面疎紆迴千里夢驚喜數行書釣
渚空啼鳥青溪淺漾魚憑思好風景行李漫躊躇

春日出睦州城遊北高峯寺

淺瀨晝鳴柳春風觸緒長雲中連塢舍山半壓城牆野
火明樵路宵鐘下佛堂釣臺何所見烟月晚蒼蒼

富春江

春寒三月盡風雨富春江一線分天影千峰赴海幢重
雲飛瀑布巨浪撼蓬窗髣髴精靈過歸心逐此降

送徐子能歸芝山

作客爾先歸還家霜雪飛病中搔短髮歲晚惜斜暉想
到梅花日應開處士扉故鄉有耆舊寂寞尚堪依

吳江夜發

忽覺夜風至開船夢暗驚漁燈猶未滅江月正初生越
樹崇朝色吳門昨夜情相憐遊子意過雁寂無聲

寄家放庵兄

達夫真好學遲暮乃知名莫以戶庭累重牽婚嫁情問
年將五十讀易曉生平有子如徇外買田須勸耕

涼谷

著書常早起春日隱蒿萊山氣不可觸柴門猶未開落
花摧細雨啼鳥戀空臺且莫斂懷抱餘寒縱酒盃

曉發燕子磯

風雨亂雞鳴披衣正五更危磯吞水面疾櫓裂江聲塞

雁一惆悵沙鷗相送行明時羞獻賦誰與念生平

野火

薄暮微烟起山家辨火光夜珠時上下神館暗蒼黃谷
口停樵客溪邊掩夕陽王孫莫歎息春草未曾芳

虞山省楊子常表伯

鄉居三十里城郭不相聞園內馴禽鳥門前足水雲清
尊邀入夜白髮喜談文若問謀生事春田草未耘

秋夜

虛堂復何事入夜但聞鐘送客還茆屋攜琴就古松清
陰生暗壑涼月上高峰坐覺林香滿巖花開幾重

送顧見山河道赴都門

畫舫出雲間閭亭暫取閒離家前夜月對酒故鄉山赴
闕非懷祿乘時欲濟艱長征遙計日秋水正潺潺

秋日再過嚴陵

作客易悲歡秋天又早寒雲山常寂寞世道自波瀾暫
住梁鴻里重來嚴子灘風霜羈旅色不敢鏡中看

平望

一氣自蒼瀨難分吳越天
鳥隨楓葉下帆帶夕陽懸
古驛深苔碣橫橋鎖暮烟
兵戈猶未歇飲馬太湖邊

旱

赤日無雲氣長風四野清
祇求涼雨過不敢計秋成
簷燕侵晨出山蟬競夜鳴
那堪郊外望處處桔槔聲

休休庵同梵林登師巢舍弟

月明須放飲難遣是殘冬
有弟知艱苦攜僧共懶慵
燈

昏長對佛霜冷不聞鐘遙憶砧聲裏寒衣授幾重

髯僧述雲臺名勝

戶牖生遐矚登臨說過來兩峰低日觀諸島拜雲臺
畫沐魚龍氣宵聞鸞鶴哀老僧親見後三度碧桃開

湖心寺

湖水浮千頃春流沒半篙石屏寒漲沙烟樹障波濤
寺有耕田利門無送客勞山厨薄滋味四序剪溪毛

送何大左車還白下

時留浙署

湖水沈沈綠煙花泊小船到來春繫馬歸去暮聞蟬親
老難為客心知恨各天也應常送別怕向酒樓前

其二

迴憶家園勝山陰道上多扁舟離越館明月滿吳歌
事尋桃葉新詩詠菱荷烟雲如落紙換得右軍鵞

其三

九龍峰影下遠遠一帆張漱里當溪岸東城有草堂
聽泉還獨過看竹更誰將川陸雲陽便休嗟江路長

其四

白髮江南住年年菽水虛歸囊懸負米截竹慣盛魚君
去麥秋節途逢轅犢車平安賴傳達堂上病將除

其五

年少應徐輩奇才吐夏雲柯亭知者少鹽樾歎為羣且
重許身節母求先達聞柴門秋爽下散帙倚斜曛

送唐祖命入閩

烟雨武林秋相逢上酒樓征車無滯跡明日更行舟星

出三山沒雲歸五嶺浮羨君垂白髮物外任遨遊

王于一自崇川至又送其過江上

山陽同避亂孤棹過崇川家累移湖上詩窮自海邊空
城千隊馬落日一聲蟬君問江東路曾留幾井烟

竹外

驚看盈尺筍翠影到柴門出土雲霄氣滿天風雨痕烏
聲如隔澗人跡不成村賴有田間叟乘閒共把樽

東園訪張三牧公

延陵船未泊到即叩東園野客不知路蒼頭方候門他鄉家已破老母齒尤尊艱苦良朋意為言雞黍存

琵琶女

養兒不識字教女學琵琶一撥勝越艷再彈過吳娃日供三斛黛夜買千錢花不願入朱戶願從豪富家

京口訊潘江如

亂後家園在天留處士貧入城看敗瓦居巷寂無鄰水活宜栽柳山低好負薪齊門難鼓瑟歸老著書人

泊舟太湖是日即解纜

預儲今日酒暫歇雨中船
湖氣涵煙草人家傍水田
石衝垂釣路烏沒挂帆天
聞道越江好此時應采蓮

聞梅杓司歸敬亭

客自白門過知君返故廬
鄉關兵火後山色夏秋初
雞犬舊司宅田園重買鋤
是非江海上避患學潛魚

五更

五更喧市舶伐鼓祀靈祠
水急星如掣手帆開樹欲隨
塔

光垂幕歷漁唱起漣漪獨有滄洲思白鷗知不知

晴

閒門多積翠燕雀喜新晴四月榴花滿一天秧水生溪
光圍破寺草色露東城縱有樵人過牛羊不受驚

涇溪暮泛至湖口

放船溪水曲引纜問田夫返照上簷瓦秋聲入蟪蛄潮
來表術墓月動記光湖誰為捕魚往因人呼釣徒

雪霽放舟答雲子見別詩

蹤跡悲浮梗，雲山倦采薇。
離亭一樽酒，客路兩重衣。
雁字霜中斷，梅花道上稀。
淮南風雪後，我獨掛帆歸。

東臯主人留榻

草堂懸木榻，燈照不眠人。
獨樹聽殘雨，寒塘斷比隣。
靜知交道薄，轉覺酒徒真。
明日江東路，波濤愁問津。

有贈

白髮牆東叟，天明獨灌花。
豆藤牽纓室，苔蘚上漁槎。
月落留殘魄，雲晴變早霞。
此時逢客到，尤喜斷鳴蛙。

談長益留楚中未還

江聲寒白日環抱野人扉
一自出門去空巢有燕歸
依槎潭影動投館夕陽微
不有登臨者天涯誰息機

拳石臺

天青入孤望怪石卧層臺
樹密朝無雨溪深夜挾雷
艤船驚白鷺掃地落黃梅
遙覺峰巒到東南霽色開

石塔院哭潛江劉學士

著書期後世夫子竟先祖
可嘆黃花節傷心白社孤
人

間空手澤地下辨歸途蕭寺秋風裏門生泣向隅

買魚

寒月明絲網攜錢買活魚雲歸雙岸出星落一潭虛沽
酒誰為對題詩只贈余風波最安穩湖上可茅居

防兵移至石塔介公過白門矣

石門猶古剎戰馬牧迴廊燕子不成壘春風何處翔上
人遊故國錫杖挂空房幾見殘僧在停鐘麥飯香

觀獵

青草郊原外黃沙日氣蒸驕風嘶怒馬健臂立飢鷹細
柳將軍過窮崖獵士登橐駝垂野獸鞍上月輪升

與寶月庵老僧

三載不來此老僧意尚真聽鐘無別事沽酒莫相嗔月
亂風前柳溪生雨後蘋入吳傷逆旅不信是吳人

家巖若移居峴山

峴山新買宅兒女就桑麻薄日東隣樹寒風處士家力
田餘飲食養母惜年華莫更驅城市南方正鼓笳

采葛

何必思公子難忘采葛情宿根在遠澤新蔓過前楹黃
鳥復來喚朱顏空後生鄰家女不解月夜獨調箏

周二為荷亭

醉向荷亭宿荷亭荷正妍秋蟬非一處暮柳盡生烟草
藉陳蕃榻門通范蠡船主人邀更酌不敢逞高眠

贈龔半千

江南一老丈破笠伴孤筇邦水且浮宅鍾山無老松挂

金剛山志卷四
琴聲滿壁待客叅加春買隱何年事閒圖江上峰

野泊

野泊沙堤暮迴風荻港生鳥歸京峴樹山鎖潤州城石
怒潮相狎魚寒夜不驚二更難就枕江月太分明

秋思

落葉滿秋林秋聲不可尋高樓有思婦夜起彈瑤琴越
國海雲變吳江烟水深輪臺千萬里何日罷笳音

同孫豹人泛雷塘

沽酒出城外來尋漁父家借船經夏浦帶雨看荷花水
漲蛟涎冷風香燕舞斜美人撤錦帳日暮弄琵琶

同友人出郊外

便作揚州客寒濤不可聞有家皆逆旅出郭喜同羣蜀
井前朝蹟隋宮新鬼墳隔江烽火後移駐水犀軍

寄張淮山吏部

遙憶釣魚臺園林向水開清風一下榻明月共銜杯野
鶴時相過閒鷗亦往來昔年此風景繫馬獨徘徊

屏風山

寺後山光近通明一竇懸陽鳥中外景桂魄往來圓孔
雀張雲翼芙蓉列漢天蒼茫靈氣厚知與岱宗連

登影翠臺望泰山

嶽氣撼虛空登臺自不同千峰遙枕北羣阜獨朝東雲
落碧霞殿花飛青帝宮還疑霄漢近颯颯御天風

羊流店

風流羊太傅故里至今存日暮思三徑天空問九原雲

整開遠嶂汶水帶荒村父老談遺事林泉細討論

蒙陰

東蒙高在望我欲采靈芝未得江心汲先憑石火炊名
泉隨杖湧斜日下山遲且喜乘新爽春風已過期

聞友人村居之樂

勞車何日已羨爾寄青門桑柘栽千樹漁樵住一村情
閒能狎鳥客到即開樽人事如流水山家總不論

青駝寺

津樹影婆娑離亭悲且歌人烟行處少山色路傍多倦
馬渴奔水征車怯上坡夕陽明滅內古寺指青駝

半城村

夏霧野冥冥瑯琊枕北屏迎眸沂水白迴首魯山青老
婦賣春繭貧農仗雨靈半城村市罷初地讀碑銘

懷李青章公車北上

北闕繞燕雲春風獨憶君離憂應共切言笑孰為羣天
路鴻音遠山丘蘭氣芬去年相送處門外駐斜曛

宿遷

搖搖心靡定去去路將殘聲入黃河險情隨綠野寬鳩
鳴初下樹魚活未離竿待趁風帆過波濤拂面寒

自解

入眼藤花落新詩不禁生登樓當有月聽鳥到無聲年
少難摧折情多變老成舊遊知幾處昨夢石頭城

初秋雜詠

葡萄帶雨薦盤時事事驚心遊子悲一點螢光秋草外

露濃飛不到書帷

其二

一劍空為道左留
葛衣寒甚不經秋
可憐驟雨狂風夜
浪打湖干避亂舟

其三

薄薄雲衣淡淡明
一蟬向晚獨留聲
池邊綠葉隨風捲
開盡蓮花秋水盈

其四

江干有警望飛援羽檄星馳馬足喧二六時辰鐘磬杳
祇林反道是桃源

其五

涼風淅淅扇窮途雁未南征少帛書昨問故人家不遠
輕帆兩日射陽湖

其六

聞鐘端不是聞笳靜裏秋聲反憶家飯罷老僧相對坐
蒲團移近鳳仙花

其七

漠漠一望渚田青
禾耳叢生泛野萍
自到秋來無好日
滿天欲雨亂蜻蜓

其八

散盡珠璣輾轉貧
新秋早起看垂綸
為言姓字同泉石

湖上閒鷗識老臣

為劉阮
仙前輩

其九

病骨逢秋影亦寒
鬚眉常借水中看
山僧雖樸能供客

親摘園蔬佐曉餐

其十

薜蘿繞屋佛幢清
幾日纔秋絡緯鳴
不是書生空露坐
代籌時事夜談兵

其十一

愁苦迎人便解詩
禪窗翻覺夕陽遲
秋風吹落梧桐子
小鳥銜來復上枝

其十二

烟火蕭然里巷空
人家半借甓湖中
淒涼促織喧秋夜
織得愁絲幾萬叢

抱犢山房集卷四

欽定四庫全書

抱犢山房集卷五

錫山 嵇永仁 撰

雜文

通濟橋記

金華通遠門外距城一里為通濟橋舊址壞於兵火修則無基建則費詘每遇霖潦暴發溪湧山高渡者目駭耳回夔魑坐水底待人而食人多死之或曰鬼實禍焉

守憲胡公始至思所以洗民患者獨力未易支也乃捐金倡募合僚屬紳士商販所輸可得萬緡遂精簡廉幹經營相度伐木於龍游鑿石於遂安遴匠鳩工築基肇址時苦春漲人力難施公望洋而嘆俄而風翻水怒如有神物排銀濤而驅雪浪一時水涸見底徒衆踴躍用命為立石墩墩成復大雨滂沱水汪洋而盈者如前其所採買山木皆得順流直下若或航之是一涸一盈適遭其會人心勸而天事宜也往者造橋之役誅求大戶

督責富商苛派里夫伐傷墳樹生者不寧死者失所以故經年不成經數年不成雖或成之經數十年輒敗皆蓄怨積怒之所歸也豈能久哉公獨不然輸者獎否者聽力役者給之米薪故其成易易也方橋垂成時有老人夜聞鬼語曰工竣矣若輩無安身所奈何應者曰俟諸來日如是啾啾者久而始散老人心惑之次日渡者六十餘人老人亦附舟俄觸夜來所聞倉皇登岸不敢渡是日天氣晴風亦恬正渡未半湍激回焱風濤迅發

須臾舟如敗葉倒景蔽天渡者號哭之聲殷殷雷砰岸人刺船往救而篙如萬石弩不可動人謂鬼力所憑而人舟已沈沒矣觀者舌擗口張嘆息而已因相與酬酒奠之曰使公早來安有此患它日橋成吾儕又安復有此患乎於是樂施者甚多効力者愈猛閱三月而告成工始知人定勝天鬼終不能為禍也已而予用有歎也孫樵曰樵嘗為褒城驛記恨所在長吏不肯出毫力以利民及覩滎陽公以開新江受譴豈立事者亦未易今

幸胡公肯出力利民而不裒於民又樂發民馴呐與公相信不至如滎陽公喋喋教令日白其意於鄰民且喜徭役尚省得便宜舉行既不能病民亦不能為官憂三月落成無事聞之大府與劾之有司也是均不可無記雖然橋成而記之民意也非公意也

七竹軒記

東陽署之右偏為余授書所庭有隙地半畝種竹六竿余顏其軒曰七竹以余故也竹固樂得余為友而增其

一也然而此君之不宜於世也久矣其心空其節勁其質古其色蒼然而秀空者無物勁者自強古則守樸不競蒼然而秀則磊落自好是吾儕不可一日少即流俗不可一日多也余也其敢望乎空山之中多紛紅駭綠之品幽素者弗尚也塵埃之內有凌霄蔽日之姿軟媚者弗樂也我所棄或為人所取我所取或為人所棄是故此君幸而遇余不至鋤而去焉而又與之為伍投分結契歷暑踰寒彼既不孤此亦得偶其不幸而余去也

則此軒空存安保後之人有顧名思義者乎於是作記告之曰凡入此室處者幸善遇我同類

疏枰記

宋子抱幽憂之疾不樂仕於時退隱射陽之濱自號耕海潛夫名其圃曰疏枰余謂疏者治生之細務枰者造物之爭端何取諸宋子曰人病無事耳有入世之事即有避世之事避世者耦耕荷篠荷蕢之類是也余生而衰孱不任力作寤而蕤蕤寐而魚魚一切勤苦煩毒之

事弗舉於趾而累於手者久矣然獨愛種植出也抱甕
入也灌園不知其志之劬而力之憊也余有老母春秋
頗高老人健忘余種菖蒲以益其聰老人多思慮余種
萱草以忘其憂老人氣不足余種申椒以延其年老人
愛哺孫余種棗栗以佐其飴老人厭淡薄余種葵種薺
以甘滑其味至於瓜瓠苴荼則與山妻稚子以為常食
是亦可以終其身乎若夫人世之變幻倏忽千百萬億
固有不忍言者其形容怪誕如鬼魅其肺肝酷慘如刀

劔其言語反覆牴牾支離輾轉呶呶不可聽其朝而駢
肩暮而掉臂陽敦玉帛陰擠下石之情狀如山谷江河
之險阻而洶湧此其勢如枰然黑白紛紜勝敗倏忽角
智鬪能忿爭莫解詩曰憂心奕奕奕者局之無定者也
詩人以憂心擬之余則以鋤刈糞溉治之豈不脫然無
累也哉余曰善存諸心曾七八年偶有所感乃述其言
以為記

與曹秋嶽先生書

桑乾風沙之內曾邀先生枉顧拳拳以生事學業為問
誠哀家貧而憂失學也嗣後某隨大叅胡公復過金發
偷暇讀漢書一年讀唐宋諸子又一年王子于一更勸
讀尚書於是粗辨古文家數然舉筆臨文則又茫然矣
竊歎古人學問有成類皆牧牛耕犢樵山漁水於窮困
發憤得之未見有寄人籬下溫衣飽食而能窺文章堂
奧者也某棄而之間里思欲究竟此道堅不出門奈老
親弱弟衣食不繼不得已復走風塵為觀察祖公所留

公稔某緣養親而出為預備父母百年事恒馳寄菽水
某感其恩遇條畫治河數策時河苦遭徙口決運梗中
外惴惴觀察以策上河憲河憲上大府各嘉納報可不
半年功告成某得抽身還吳因念江南文衡客歲有伯
樂之顧益急圖下帷恐負知己乃還視故鄉無一枝可
棲為養親地又不得不擔簦出遊冀越中當路稍潤巾
餅歸買一畝之宮率妻孥奉高堂甘旨再出餘貲俾弱
弟分半耕讀某亦得不憂饑寒則三十年以後之心思

氣力皆可不用之衣食而專精畢慮於文章此某生平之榮願也某到湖上之日即謁林鐵崖先生始知先生讀書客中便期趨侍教誨以足痛未果不意先生折節先枉存我逆旅何前輩愛士急而憐才切也夫軒蓋聲施之地往往奔走貧士有同雁鷺而士之傴僂屈折於其門者仰伺奴僕意色求一登堂尚不可得豈敢望大人先生之就見哉某於今竊自幸矣幸大人先生既不我鄙棄則必以若人或有一得可節取而造就之故不

憚孜孜汲引是以聊自壯也抑聞先生囑鐵崖先生語
須勸勉嵇子讀書至諄至切則又何相見之暫而相期
之深邃相督之嚴也某思古人學問要皆有得力親切
之人如一瓣香專歸南豐者事非一二某待今人詩文
頗嚴然亦不肯輕恕古人若時賢中大人先生有類先
秦兩漢初唐者則又不啻古人之好好之矣方今海內
名碩輒云子雲多而桓譚少某正謂子雲未必多也不
過往來稱弟子者一二虛聲侯芭耳芭文不見於世乃

以為揚雄之書勝周易殆過諛甚矣某不爾也某於當
今鉅公詩若文顧亦曾手追成書矣然每不自量竊欲
厲掌奮膝以紹禹功獨於先生詩文未獲全本十年之
內或從一篋一箋積累鈔錄合諸體不滿二三十首以
此為平生憾常擬負笈躡蹻不計道里修阻從先生小
胥私乞縑緗繕寫數帙又苦魏勃無路可効掃門今幸
先生駐此則某可省夢寐之勞與風雨郵置之瘁先生
顧何惜盡傾所藏稍飫調饑使一介輒生捆載而歸淮

水也乎伏楮待命可勝發憤

上嚴灝亭先生書

某少碌碌四方余澹心為字留山梵林圖之越數年秦
淮樊圻謝成吳宏高岑鄒詒又續為圖合肥公官司寇
時愛而題曰疎林茆屋步步引入山之夢櫟公覲長安
相遇白雲觀中亦有黃塵猶在面辛苦賦留山之句又
題曰樹前石背有著雙不借循書聲而來者非他人乃
櫟下生見山比部更變為五湖操艇之圖詩云我慕鵝

夷潔期來弔五湖自是江以南北莫不知有留山堂留
山堂云然某實無堂也年來方伯袁公廉使金公贈買
山錢始得置屋溪上而四方之熟識某者仍在車塵馬
足間卜之而不知某實有堂矣夫豈惟有堂且得名公
大人如先生者枉存陋巷足辱蓬門使鄉人知有長者
車轍某得稍賢於傭販牧豎之萬一且不至如往日尋
聲覓響索某於東西南北萍水無定之鄉不亦大可幸
哉某今更有望者先生之詩建幟中原吾黨詠歌已久

獨先生畫不多見知先生不為世作畫某竊擬先生畫
當蒼老疎宕全是元人其秀潤圓潔仍本宋人家數夫
元畫非別有源派不過脫胎宋人化整為散化正為奇
化刻畫為高脫先生蓋真用此意哉間嘗攷之周時禮
明樂備六藝浸淫畫從此始穆王時其臣封膜作畫厥
後帝王之家設立畫苑學士公卿間以繪事應制則畫
亦非尋常山人墨客小伎薄倆而已也某今請先生為
作留山堂圖其間柴門流水破壁頽楹固不足繪願先

生繪其境界峭特者俾某異日短衣犢褌推鹿車載父
母妻子入山當以先生一圖為今日百朋耳舍弟師巢
亦粗學作畫特令齋繚造門長跪以請伏惟教誨不宣

與周敷文書

去歲作書寄足下迫於跂慕誠不能已時觸境造辭中
多感慨失之亢激非所以通殷勤致繾綣也深恐足下
以鄙妄見病用是慚悼積今彌載比得張子書來知足
下意中尚不忘僕幸甚幸甚僕少不自重好詆諧雜劇

譏刺平生不當意者自知獲罪名教復不肯劇心帖括
與二三少年馳騁場屋獵取聲華長老先生每見余所
為則羣起而嗔責之謂之怪誕比年念高堂垂老乃始
掇摭章句謂可希世干進然廢日趨時而學終無補於
古人充棟之書又十未見其一二然後悔此事之誤人
而春華秋實之兼隕而落也因遂盡棄其口誦手抄之
文復肆力於長老先生前所嗔責怪誕之事又以學識
未堅探索未廣漫然行文僅取佶屈聱牙艱澀險僻者

以為差異今文不知其大悖於古文也遠矣近益爽然失惴然思取五經晝夜讀之更取孟子左國遷固史漢晝夜讀之又取唐宋韓歐兩子晝夜讀之方知聖賢文章未有言不見道而能傳於千百萬世者也僕今且未敢言文而先學道道苟一日有成高可以辨古今治忽善敗人品邪正真偽如辨九宮黑凶白吉黃平碧毒分照天下也即次亦可與少年馳騁塲屋獵取聲譽不至如時文輕脫滑利故多其轉折空其字句令人見之亦

喜然去之竟不思也僕向往來江淮交遊不乏邇以教授生徒刺促尋丈之地盤旋坐卧顧影兀兀又不獲勝己之朋進德之友相與切劘淬勵俾得蚤聞道也可勝歎哉可勝歎哉僕生二十七年忽忽悠悠汨沒殆盡往者既往來者將來新者未新故者仍故計人生壽考之年以六十為準如僕輩鉤深致遠勞形敝神又當少活十年此五十年中已過強半其間進退甘苦行止順逆天時豐歉人事夷險境遇離合情慾悲歡大抵不過如

此其後二十年中亦不過如此即推之百年寧復有異
誠知生人之趣有盡而見道之日難遲也僕聞足下學
道頗力因求所謂勝已而進德者舍足下其誰與乎僕
知足下善事老母足不出里閭有歲時伏臘之樂僕兩
親皆白髮待養於僕之一身又以山川阻隔非可朝發
暮至每見風俗除夜雖傭販牧豎皆知買魚沽酒宰雞
割豚肩羅列五辛跪拜膝下稱觴頌具慶僕士人已蹉
跎承歡者六七年而今年又復蹉跎興言及此便已摧

心傷骨若受鋒刃此誠仁人所共憫惜也今足下只盈
盈一水相見無期僕擬買棹錢塘與足下傾倒數日夜
徧歷窮崖絕谷飲醇過日勿復談文章得失湖山有靈
其并持此書訂之

寄林鐵崖先生書

每從放庵家兄處讀先生往來手札深到婉摯如託肺
腑舍姪輩叨侍几席奉教誨有通家之誼某獨不得從
先生遊為可怪也某道經西陵者數數矣食穀於人動

止拘孿身無童僕道路茫昧出不知所之行不知所底
雖生嚮往輒復坐廢某自結髮讀書以家道中落奔走
饑寒學殖荒落無有一是近因老親垂暮竭力不遑私
欲退處井閭業於醫卜一終反哺之願但諸弟孱弱耕
讀兩失若某一人朝夕自奉甘旨不如督諸弟成立各
能揚名親心懽悅尤甚於養以此怵迫東西手口交瘁
乃直道事人動輒得咎能容於大江南北而不能伸於
咫尺之地為當代賢士大夫所體貌而受讒邪小人之

間沮吾道多窮可勝嘆息自夏徂秋悲傷感憤竊慕古
人窮愁著書之旨因撰西京雜語三十篇就正有道以
病中書嬾左右又無書之者求教之心逾勃勃今先檢
舊文二十首呈覽幸賜批抹倘狂夫之言不悖於道然
後敢徐出其有以辱斧斲否則養羞藏拙而已昔李翱
之作不經昌黎指授則不能傳蘇軾之文既得歐陽知
已因而大著某之望於先生者豈其微乎豈其微乎

羅舍人入直西清序

癸卯冬余從友人入燕舍館之次日聞舍人文戰不利
留長安未去急往訪之塵沙蔽天寒風砭骨夾雜牛馬
間輶輶殷殷心目惶惑薄暮始叩舍人扉見其敝帷破
篋几榻蕭條僕多饑色是時舍人他出余詢其僕曰爾
主人何至是乎此地多貴人長者豈不能惟朝夕是謀
乎僕曰主人素自愛每朝懷一刺出門至暮無所投竟
返以是潦倒羈棲罕有知者主人亦不求知也余曰夫
既不求知矣盍歸爾田廬乎僕曰主人慷慨離家與主

母決誓詞謂當時懸金印紆朱拖紫拜父母堂上已而
拊小主人之頂嗚咽不能聲遂振衣而出挾空囊襆被
孤身寄五千里外今雖下第尚喜

朝廷多途用人儻苟且就一官邀升斗祿免嗤於鄉里
小兒亦平夙心君何輕言歸也余愀然曰今人作別妻
孥歸先計期行先計日擇吉治裝灑酒祖道戀戀不捨
短氣於房幃之中爾主人抑何壯也越一日得晤舍人
舍人沽酒燕市酣嬉淋漓然後別去越數日再晤余將

放舟南下問舍人何所屬舍人無言但曰東望會稽煙
樹蒼蒼雲山漠漠為我殷勤致之甲辰歲秋舍人遂得
官余乙巳春復至都門以酒賀之曰子可以上報父母
下慰妻子矣舍人於是具述其由而繼之感泣余知舍
人向非忘情於家也蓋有大不得已焉舍人尊公作宦
淮南士悅民懷久於其職中惟禍變坐逮吏議比法曹
白其寃而已狼狽不遑矣攜家東歸僅敝廬數椽瘠田
數畝家人耕種力作以為饘粥教子弟讀書益勤舍人

慨然興起曰余少年矜氣節慕交遊破費兩大人資產
長為農夫以沒世大人何賴有子哉以故發憤而至於
此也今舍人方出入金馬門以左右宰相給筆札戴星
而趨日沒而退食凡禁密之地大臣議事之堂中外不
得與聞者舍人先習聞之以視偏州下里曲士小儒誦
通都大邑條教號令則轉相告語父老以稱道新政者
其相去不既天壤哉又見進士初作吏者類起家縣令
始仕刑官幾經遷次猶不得望承明之門躋清華之選

舍人可用是自壯矣而猶以出身太學為憾母乃過歟
余與舍人垂髫同學始讀書公路浦舍人年十四已補
弟子員余年十五尚寄籬下舍人學舞劍興發時染翰
濡墨狼籍几案余好吟唐漢人詩歌樂府及宋元詩餘
小說暇則彈碁射覆以成嬉樂繼而讀書傖塘萬山之
中雞犬聞寂水鄉屈折魚稻肥美余常濯足溪流擢歌
橫發舍人入長林豐草張弓射雉兔鳥獸駭然驚大笑
而返夜歸讀書童子淪茗剝笋動至達旦自是余列庠

吳中隔兩載復往會舍人於山陽讀書鏡林署中舍人
折節好學醞釀老成為文宏通典瞻期於自然中節而
止舍人素以兄禮事余余得以猶子常拜兄母夫人母
夫人曰爾小子幼年結納願始終不渝窮達一致有如
古管鮑交因各受命唯唯余今遠不逮舍人矣舍人致
身青雲歲食朝廷廩祿給錢若干榮顯二人光寵閭里
內擢則為部郎外授則為郡佐人生讀書之願至此稍
償其半又況

聖朝用人超軼前代於西掖近侍之臣尤加優異凡有殊才皆勅禮部應春秋兩闈貢舉登進士高第猗歟羅子雖致用未宏而荷榮斯赫矣獨恨鹿鹿如余者四方餬口舌耕之苦病於夏畦所入不足以養親所得不足以置產時人非之笑之以為鬚眉長大無資身之策有內顧之憂缺室家之歡絕風塵之望舍人則曰子時不利也非才不售也然則人生知己寧多得乎哉故於其入直也作文以序之

祭海神廟文

代

康熙六年丁未秋九月淮海道某謹以牲醴庶羞之儀
梨園曲部之樂致祭於海神之靈曰維神司幽維官司
明幽明雖殊而治河之職掌則均也神自赫聲濯靈以
來率土之濱靡不儼若而淮為四瀆之一神尤萃聚故
俎豆者更衆浦人祀神匪朝伊夕一旦榱桷不修茅茨
莫翦神即未嘗過問其如下民失瞻仰何某脩員淮海
禮當禋祀廟靈未妥某之罪也爰庀厥工以葺斯宇旦

晚告成神聿寧止是未安之靈既將飾廟以安之在監
司可告無罪於神矣至於神之所攝者河若令水失源
流堤仍崩決吏遭嚴譴民困力作此獨非神之過乎伏
祈威奪黃河恩全赤子俾旁流復歸正道突堤蚤賜成
工庶神人交得相安而馨香彌見悠久也否則以數十
萬之窮夫當十一二月之霜候胝胼卒瘡皸疥狼籍卧
凍吞饑迎風立仆神忍乎不忍及今惟有急挽逆流速
奏安瀾保全萬死之災黎默護千年之疆土使本道無

曠其職業爾神亦自愛其功名毋忽尚饗

辨禽言者說

金華衆山中產幽禽好鳥弄新音怡悅人耳好事者致之盛以雕籠飼以香稻肉食晝貯清水濯之懸洞房邃閣外以為嘒嘒可聽如笙簧之迭奏絲竹之競響也客有辨禽言者過而聆焉心駭其聲語主者曰此非愁苦無聊羈棲怨嘆之聲乎不然何其哀鳴宛轉而頓失山林之常度也主者曰有是哉子誤也客曰余往者山行

見灌木之上豐草之內青溪曲澗之旁有若禽者載頤而上載頤而下或飲或啄且鳴且飛其聲曠逸而清遠疏越而嘹亮幽閒而和平今反是是桎梏之也蓋舍諸主者曰噫是何言也余朝擁衾牀上聽其音則欲起食不甘旨聽其音則忘饑暮倦而思休聽其音則節勞而釋因果其桎梏之而哀鳴宛轉耶則余何為而樂也余固不忍舍也客曰不然天下有在已為樂在物為苦者有忘物之苦恣已之樂以為物亦樂者夫人亦然豈獨

禽鳥云爾哉

蛇鬼辨

人情之所惡者莫如蛇鬼以其醜而惡之乎以其傷害人而惡之乎二者兼有之金華郡南城有廢署地頗廣相傳為宋自公堂荒穢不治叢茨蔓長鬼墟其宅蛇數其圓人入於中者輒死不死者出云鬼衣冠壯偉乘黑蹇驢陰悍剽賊擲泥弄土塞室生人孔竅以為嬉樂有蛇昂首引吭縱尾出樹下蜿蜒丈餘目光鑠電躊躇而

來如欲搏噬人狀長吏聞而驚戒守者局鑰非乘傳百
人毋縱入余以偪居暑病擇地而逃攜弟子及童僕三
四人就自公堂後灑掃寢處雉螺羸除蠪蛸內懸繩
牀外置石鼎烏行於堦蟬唱於樹焚香讀書晏如也倦
或登危樓陟荒臺經頽廊弔蕪苑選石而坐清風之來
灑濯其心夜則螢火紛如蟲音喧寂幽夢逾清旅懷不
溷迺知向者相傳之謬也抑又思之彼其有託而言歟
鬼之為物陰也蛇亦陰類陽道不勝遂結而凝陰陰氣

太銳復犯而乘陽此君子道消小人道長之象也不然
鬼之毒吾人甚矣蛇又濟之以虐人其尚有噍類乎

抱犢山房集卷五

欽定四庫全書

抱犢山房集卷六

錫山 嵇永仁 撰

附刻同難二先生詩文

次和淚譜

會稽王龍光

江左嵇先生名永仁字留山別號抱犢山農其世系通顯具載家乘可考而知也先生少負才華奄有聲稱居恒以救濟民生為已任家於錫山居里近城東講堂自

名其廬曰東田邑侯吳公伯成顏其額曰東田書屋嚴君中翰公與太傅范公周旋京洛為故舊交比見世多擾攘棲遲田里性恬淡不事經營先生善養志凡父所欲為與未及為者皆力為之先生孝友性成而才足以相濟所由甘旨自裕而中翰公亦得優游林泉也先生少為諸生食餼有年噪聲名場中所為文章往往為人傳誦輒取科第已獨屢挫場屋鬱鬱不得志以親老昆弟未成室出就館穀當世知其具經濟才或聘治河或

諏荒政歷有成效為廟堂所許可先生嫉惡如仇多與
小人齟齬而鬼蜮含沙害之者不少先生固無恙也少
曾受業於鞠存張公之門張公居江淮所稱東溪先生
者是也東溪教先生為詩歌古文詞手授漢書經史諸
編學殖淹博著述日富有葭秋堂詩竹林集留山堂初
刻又好為填詞工北曲其遊戲三昧一種詞壇豔稱之
若珊瑚鞭布袋禪自以為少年筆墨不稱意惟揚州夢
頗自謂略窺臨川堂奧櫟園周先生擊節其妙云與王

漢恭之想當然並傳為序以弁之且謂先生風度彷彿樊川慷慨有大志而不拘小節者也先生惡文法之徒叢脞政事出入輕重高下其手刻集政備考一書便於仕宦給諫楊公自西序而行之先生尤精於醫蓋其始祖家本中州石首公諱適為主簿於楚有惠政小民俎豆之祀名賢祠宋州公諱穎以學士扈從南渡子姓散居吳越迄今雲川之練市吳門之蓉莊皆有傳派先生乃蓉莊之宗支也蓉莊祖瑩白玉蟾為之卜地云後世

當出名醫以是子孫多習岐黃業先生到處負藥囊活
人疾病著東田醫補四卷江右李孝廉與偕珍於家欲
代為梓行以傳世先生以數奇不偶將欲退耕梁溪之
野賣藥金昌之市隱而不出感范公知遇從事於三山
五嶺間東裝之日錫山邑侯吳公偕諸名流置酒聽梧
軒餞之各賦踏莎行一闋以憔悴二字押韻中有孤城
殘角夢家山亂帆影裏人憔悴之句先生見而憂戚歸
告中翰公曰此行恐不利中翰公曰太傅舊誼何可忘

促之行至署輒病以此意達之公公堅留亦和前韻以
廣其意有停驂暫緩入山期哀鴻待爾離憔悴句先生
勉留焉至仲春先生賦詩曰不知何事春三月剛到清
明又憶還公解其意雖許之歸而未果也先生過仙霞
時謁闕夫子廟盟於神前曰余此行惟以救民為務若
萌利欲私心願奪我嗣天地鬼神實聞斯語方逆藩潛
蓄異圖先生知之每告公曰事勢蹙迫宜早隄防與其
為忠臣毋寧為良臣又曰神龍見首不見尾屢以危言

喻之蓋先生實為牽情慕義而至於此非昧於幾先者也不意遂及於難豈非天哉被難之日先生握手謂余曰吾輩將從公於地下矣余點首以答之先生神氣自若了無怖懼以一二言懾服諸輩之心同就於繫逆雖脅以刀鋸誘以爵祿毫不為動在犴狴中先生猶存心救世晦明寒暑筆未輟手續著東田醫補若干卷求方索診者不一而足先生嘗嘆息曰死無餘恨但醫統廢墜學其術而未大展活人之心耳又著詩二卷一卷和

蒙谷作一卷紀變又填雙報應詞三十齣乃為揭公重
熙死難之事其亡友袁參嵐託其表章茲聞林翁談報
應事云揭公已為建寧城隍先生感而為之以報亡友
其於患難中不肯負人之託沒人之善如此又在獄有
百苦吟皆囑友人收藏之其囑友人詩曰此身若遂沈
淪死留與寒家子弟看可喻其意矣嗟乎天豈以是限
先生哉先生年甫強壯蘊有經濟為世大用子二人長
曰曾筠次曰右丹皆弱稚未成人然英英已露頭角天

之所以報施先生政未有艾也獨是余以暮年同淪難
底朝夕飫聞先生之教敷陳大要闡晰至理悲歌慷慨
具由天性余之受裨益良非淺鮮謹述大畧以見先
生之節義文章並堪不朽誠無負於公亦無負於天
也

颶風 和百苦吟原韻

澤國秋高信海風年年飄忽吐龍宮風神若解憐忠義
吹盡寒灰歷劫中

瘴雨

淋霖瘴雨勢傾盆涼氣無多熱氣存布被一牀微爛盡
漫勞東閣報公孫

積潦

山城土竈滿蒿萊魚鼈經遊草樹堆莫嘆南天多瘴癘
江河日下盡堪哀

炎蒸

揮汗成漿三伏期陰房偏受熱風吹如爐長日從銷鑠

一片冰心覺自宜

凍雪

滕六天南說禍胎連年飄散浪疑猜信如今日多爭戰
骸骨成丘白作堆

連陰

白日經旬長自扃擡頭不放曉天青何時一破重圍怨
海國全消毒霧冥

梅濕

梅雨三山瘴霧天陰晴氣候苦相連爛衣一束供高枕
淚落殘更透破氊

泥濘

著屐東山座上紅游蹤今試雨泥中喜來屐齒何妨折
雙足強為亡是公

昏黑

夜偏油火晝偏昏毒霧淒淒斷客魂生死由來同夢覺
自憐棲息避雞豚

昧旦

中宵無寐枕空安
輾轉單衾歸夢難
唱徹雞聲天欲曙
曉星落落望更殘

瞭燈

明滅寒檠影半黃
五更餘燄照頽牆
獨嗟短夜無歸夢
拭盡啼痕天未光

屋漏

沈沈秋夜雨長懸
濕盡衣單和淚穿
暗室鑒臨形影對

儘教點滴到牀邊

濕地

賓主塵蒙驟斷魂
滿腔悲憤土泥溫
誰云正氣堪埋滅
徹夜雷霆天意存

負暄

當年就業水雲莊
今作羈囚閩嶺長
歷盡三冬寒徹骨
自教含淚向曦陽

旱澡

杯盂貯水即為盆塵垢鹿麤除色便渾惟有成湯解此意
須教日日洗心魂

蓬首

老去空驚兩鬢絲蕭蕭對鏡漫披離婆娑猶足高千丈
長嘆中宵恨自知

垢面

消盡儀容老未還愁塵萬斛障顏顏憑教洗出來時面
笑破清光天地間

學手

擗管揮戈事事工鞭雲指日笑談中直教握定擎天手
暫作旁觀兩袖籠

繫足

踏盡冰霜歷歲寒邯鄲學步路偏難名駒一息堪千里
束縛今同凡馬看

拘項

連環深鎖欲何憑引領青天骨自稜此法豈為吾輩設

書生強項斷長繩

枯腸

筆硯拋殘已數年青
緗圖史委烽煙
寒儒雖在書遭劫
藉有同心叩腹便

淚眼

難裏相憐淚未乾
老來無淚但心酸
園扉一入同盆覆
常把青天仔細看

聞析

關吏巡行夜聚牌柳鏹斷續亂長街愁中但覺聲淒絕
總向風波惱客懷

聽砧

艱難何處寄征衣未曉家山信是非留得天涯秋意苦
數聲刀尺萬家機

隣哭

閩海心傷刀戟場家啼巷哭盡離亡填身溝壑埋無土
何用招魂向北卬

風鶴

道路驚傳鬪力微
依形竊響是還非
先聲草木皆行陣
螳臂應須早見機

砲警

萬火鳴雷聲徹天
驚聞消息走狼煙
海邦莫道無防禦
刮地煎砂已數年

感粟

腸斷寒宵角數聲
天涯淒切倍關情
此身不是防邊客

莫認羈囚當戍兵

輦鼓

路鼓喧闐動客悲
妖聲相隔暮風吹
他時若駕歸舟急

搖曳中流弄幾槌

笳吹

淒絕中宵客淚寒
傷心笳管夢難安
征人莫作回頭望

南北相思苦萬般

吏稽

難裏羞將面目呈福堂苦盡羽毛輕吏人不用多稽察
青史將來識姓名

卒擲

鬼物三年迭作羣畫圖水陸日紛紜他時若現輪迴相
只恐閻浮我是君

畫詰

紛紛邏卒守街衢老廢無聊泣向隅舊僕門邊供菜食
傷心淚眼看糝糊

夜查

猙獰燃火到牀間
叫應分明上鐵環
吾輩不為無義漢
儘教狼籍鬼門關

值班

何事同舟趁逆帆
往來相對鬼巉巖
朝眠暮起多拘束
獸語禽聲口自喃

交更

蠻音攪耳夜癢嘈
情面無從假半毫
捱得愁中更漏慣

犬鳴雞唱笑徒勞

臭蟲

引類潛身浪蕩遊
尋香逐臭雜相投
已教吸盡人膏血
不放餘情到白頭

蟻蟲

捫蝨青山樂可圖
談兵定霸亦相須
當年壯畧推王猛
蠶食今知飽病夫

飛蠅

舊聞沈獄雪飛蠅今見蠅飛倍可憎莫道秋風吹不到
腥膻相逐逞何能

遊鼠

唧唧啼饑竄黠黠齧鹽淡薄罄盤盂誰教白晝爭人食
搗穴難存社屋軀

聚蚊

湖傍秦郵草聚雷露助曾拜廟客來難中莫說今偏苦
耳畔聲聲似訴哀

鬼啾

鬼作嚶啼夜氣森難中猶現宰官心蓮花法裏容超劫
不怕沈寃萬丈深

疫癘

災氣流行天意乖形如土木命如菱何當請出醫王手
莫學劉伶死後埋

碎衣

無分繁華原憲貧身僵半褐幾冬春形骸粗足供顛沛

莫問悠悠衣我人

破被

炎方一雨便秋來
敗絮蒙茸暖氣回
羨却五更清夢裏
還家更熱獸爐灰

砂鍋

鑽燧燃薪勉可為
晨昏饘粥壁煙炊
泥砂亦有調羹用
委棄人前總不知

泥爐

老來事事想安然
搗土為爐爇作煙
被底不愁魂未貼
長宵抵足任高眠

瓦盆

泥缶聊存古朴風
殘湯冷飯幾曾空
有時擊手得鳴響
驚起同牀磕睡翁

草褥

肌膚皺疊浪成痕
藉草為茵事可論
冷暖不知人老去
飄零一似蔓無根

敝履

兩足龍鍾力不驕
雙鳬家製衣著來遙
多情東郭還相愛
送與先生踏灞橋

木枕

一枕羲皇不可安
昏昏何日醒邯鄲
夜眠莫作繁華想
於我浮雲世路難

篋筐

食物無餘饒
菜羹紛紜雜貯未能清
此筐聊且充香積

方便兒童荷擔輕

竹刀

寸鐵難持聲息嚴
庖童刮竹製魚鹽
叮嚀留與歸途用
當作牙檣驛路籤

草珠

維摩方丈昔藏修
遠到三山苦滯留
何用牟尼珠百粒
菩提方寸內堪求

油簞

燈煙土竈爛如星六月朝昏生火亭聊藉清涼驅溽氣
蠅蚊一一手能經

惡紙

著書憂憤事難成欲寫窮愁愁更生何日雲煙供一掃
桑皮剪破兩三簞

臭墨

隄麝研透色青藍膠味薰蒸油氣含怕向故人酬白雪
煙煤紙上恐難甘

敗筆

羊毛一束價連城
信手聊成泣鬼兵
拈得新詩同史讀
也知直道腕中擎

磚硯

瓦胚作硯墨朦朧
煙霧和來泥上鎔
鐵石磨穿為廢棄
悔教銅雀代耕農

殘書

竹笈藤箱走蠹魚
風塵千里爛圖書
縱教攫去成何用

覆甕無多灰燼餘

炭痕

灰蹤桴跡血絲垂珠玉龍蛇和淚揮親手投來同拜讀
雷風震疊數行詩

塵灰

三年怨恨積生塵說與誰行整頓新污垢寧教都掃盡
不將清白讓他人

煙眯

爨火如星旦暮燃難將怨氣達蒼天耳昏目炫等閒事
惟待消除鋒鏑煙

乞水

貧來一勺不成烹坐向爐頭作嘆聲掬得半瓢猶德色
文園到此更傷情

覓火

冒突衝煙海國城半天劫火怪秦坑何人為設伊蒲供
重熱爐灰煨蕨羹

摘菜

菜株剔淨草連泥葉葉根根釀作齏為想遺黎多此色
焉能一一手中提

執爨

求人水火亦維艱疊喚千迴童子頑只當老僧棲破院
煨茶啜粥自相關

食淡

年來氣味淡相尋苦菜酸齏亦費金連月併教鹽食斷

嚼然何意作長吟

縫綻

臨歧無母倍傷心
針線全疎耐至今
補得冬來春又破
可憐瘦體不遮襟

浣衣

薄澣艱辛訴向誰
懷新去故力難辭
洗來垢膩湯如漆
錯認烏盆似墨池

滌器

園扉滌器體無禪司馬情多繫木根留得盤饔滋味好
不教塵土咽饑魂

粉粥

老性安和粉作糧蔗霜調得熟充腸旁人笑問何方物
彷彿胡麻飯味香

餛飩飯

自笑飢軀汗漫行祇今枵腹向誰爭太烹無福堪消受
隔宿餘糧百味生

柳茶

垂垂綠樹即為家未到清明摘嫩芽
浪說盧仝堪七椀
武彞夢斷雨前茶

劣酒

結伴高陽興不無形骸桎梏酒腸枯
故人買得常分飲
一陣酸風透瓦壺

缺藥

嘗來藥味總成虛真則無多實有餘
試向懸壺頻盼望

看看愁煞病相如

書傭

眼穿三載寸函書那有家鄉舊雁魚
童子膝前來問字
寒暄寫就意躊躇

醫匠

破帽殘衫海上方此中真假費參詳
惟君肘後多仙訣
冷落籬邊菊蕊黃

敬席

寒風浙瀝打牀頭，桑土聊為蓬戶謀。
折就蘆簾遮半席，蝶魂栩栩夜無憂。

糴桶

器物皆從破裏來，竹皮木片有成胎。
一文不吝還堪用，始信人間無棄材。

糞草

積污藏垢日成堆，掃到何時掃得開。
自是亂中羅網密，獄無青草也無苔。

穢廁

紫姑夜降掃須勤百畝農夫去惡氛但使生民無穢濁
何妨野老鼻風薰

溺器

不禮儒冠舊日情朝昏穢息徧牀楹牛溲馬勃非無用
醫道於今學漸成

惡夢

凶吉無憑事若何神思恍惚願蹉跎昨宵夢見風波險

只向高牆禱孟婆

元旦

抱悶窮冬望早春依然蒙難一孤身故園最足傷情處
此際庭梅花影新

清明

曉起愁聞杜宇聲傷心節候又清明誰知瘴嶺三年別
猶作他鄉患難人

至日

陽九艱逢網未開到今候轉一段灰循環有序春將至
遙想家山夢幾回

除夕

牢落炎荒歲月窮鬚眉華狼藉任飄蓬
誰作傳書塞上鴻

撫棺

死歸撒手便稱能生寄騰身悵未曾
莫向鬼王誇讀律
不知何例脫寒冰

客俘

相逢爾汝盡南冠
敲骨鞭皮總淚酸
何事風波爭入網
翻身隨處可平安

老親

八旬窮父病牽衣
愁子危方効力微
囑道老軀猶健飯
三年可待順帆歸

昆弟

無兄無弟久離家
棠棣闕情悵落花
子姪偷看堂上健

豈知懸淚望天涯

憶內

絲絃未續舊時絢老病天南嘆獨夫同穴細君無念我
殷勤泉下奉慈姑

思兒

母亡父遠子孤零爾輩無成及壯齡讀我殘書無散失
待余甦難到家庭

同宗

永柏家聲清白嚴詩書聚族學深潛當時記得歸家笑
道我三年幕府廉

受業

髫時學古習韓蘇許我潛心出衆徒海國三年成夢寐
空勞老眼識迂儒

同社

名流帖括揣摩深願比他山感士林同學少年頭白盡
浪遊辜負下帷心

感恩

圖維報德老成翁落拓天涯患難躬歲月拋殘無壯志
獨留方寸感無窮

舊遊

念舊金陵別會稽雨花臺畔曉風迷煙霞到處堪遊賞
莫向三山聽鳥啼

祭墩

枯木從來說有靈仰天貫索豈無星滿腔赤血行將灑

答爾椒卮一炷馨

告神

不怨青天呼應高
神靈三尺頌臯陶
知君直曲無偏枉
何不從公雪俊髦

颶風

和百苦吟原韻

雲間沈上章

撼海摧山鼓烈風
蚩尤似欲拔蛟宮
分明天意同人意
好挽危檣黑浪中

瘴雨

朝來驟雨已傾盆
城郭煙消幾戶存
最是濕衣烘未得
老天寧不念王孫

積潦

連宵風雨長蒿萊
陰霧迷離丹嶂埋
禾黍漫漫愁望裏
千村煙冷亦堪哀

炎蒸

為霖為雨拂前期
馬勃紅塵遍地吹
心境清涼揮汗少
火雲如蓋總相宜

凍雪

凍裂肌膚煉玉胎
炎方風景費疑猜
雨晴寒濕渾無定
怪指兵荒是雪堆

連陰

海雲日日鎖幽局
不見三山草木青
直待薰風來解愠
笑看皎月破沈冥

梅濕

鄉夢難成怫鬱天
頽垣赤體夜牀連
陰雲熱氣相鎔結

暗灑花斑漬舊羶

泥寧

望斷關山淚雨紅不堪
蹂踐夏臺中
騰身灑脫塵埃去
屐齒逍遙訪遠公

昏黑

暮笳悽咽正黃昏
無語空憐杜宇魂
鄉國不知身尚在
清明為我買雞豚

昧旦

婦子晨興憶問安
貧家菽水定艱難
鳴雞聲裏空流淚
剩有絲絲鬢髮殘

瞭燈

高懸燈火照昏黃
瘦骨稜稜倚短牆
一枕覺來空憶舊
紗幮辜負日頭光

屋漏

宵來點點似珠懸
濕透鶉衣帶淚穿
海國只今多旱槁
如何不灑麥苗邊

濕地

子夜誰能貼夢魂如冰似雪卧難溫
餘生糞土尋常事
贏得伶仃傲骨存

負暄

步簷忍凍憶山莊
空有春風道路長
冰雪久埋憔悴甚
倒扶藜杖試初陽

早澡

簷溜盛將水半盆
湔除塵垢不嫌渾
泥塗自喜肝腸潔

夜夜清泉濯夢魂

蓬首

拂面拖肩鬢已絲
短長梳就復支離
愁來尚憶同心綰
兒女閨中只自知

垢面

癯貌何由得大還
丹砂未轉且鳩顏
憑他冷暖隨時去
面目重光談笑間

摩手

握槊爭如草檄工持籌未展笑談中當場欲吐賓王志
袖手偏將雙腕籠

繫足

立雪棲冰頗耐寒家山何處夢艱難平生未著王喬舄
徽纒何勞著緊看

拘項

榮辱皆忘義足憑錚錚強項不模稜艱危百折冰心在
留與兒曹作準繩

枯腸

半豹徒窺壯盛年
肝腸如雪氣如煙
苦吟只為消愁病
敢擬邊君話腹便

淚眼

滴滿春江淚已乾
每逢時序倍心酸
陰房未得瞻天日
昨夜家山夢裏看

聞柝

刁斗虛張挨號牌
兒童徭役也巡街
亂敲鈴柝無倫次

慣擾思歸夢裏懷

聽砧

誰家夜夜搗征衣夢裏家山醒又非寄語沈郎憔悴甚
腰圍莫織舊時機

鄰哭

赤子何辜暴戰場驅他鋒鏑昧存亡可憐少婦嗚嗚泣
空自招魂向北卽

風鶴

寄托乾坤一葉微
乘風破浪事全非
驚魂已作傷弓鳥
悟透人間禍福機

砲警

轟雷新試火連天
不斷傳烽徧地煙
誇盡戰爭雄海國
野人還憶舊豐年

感粟

曉風吹徹枕邊聲
動我家山牧笛情
滿地干戈愁望裏
問天何日得銷兵

鞀鼓

誰辨宮商音律悲
鞀鞀聲響競
鏡吹正平若使生今日
節奏鏗鏘過幾槌

笳吹

一聲吹徧海天寒
南北征夫豈兩般
浪說封侯懸印易
萬金難買信平安

吏稽

獄吏尊嚴較薄呈
此身萍寄羽毛輕
吾曹氣節殊周勃

著甚施威高唱名

卒寧

小醜么麼結作羣
揶揄惡態故紛紜
懸空雖少軒轅鏡
劫火場中半是君

晝詰

網羅麟鳳逼街衢
鬼窟南方說海隅
草木皆兵防範密
晴天好日也模糊

夜查

恩仇細數笑談間
銜結都忘草共環
惟有夜來查鎖鑰
彼呼此應頗相關

值班

天南日日盼飛帆
未得長風困石巖
黑浪顛波顛簸慣
去來鷗鷺枉喃喃

交更

擘柝巡風徹夜嘈
輪番交代按纖毫
夢中我自還家樂
蠢爾蜉蝣何太勞

臭蟲

時候昏黃結隊遊
閭人醉夢暗相投
覺來抹煞還餘臭
笑爾橫行著佛頭

蠅蟲

景畧胷中具壯圖
笑談當世偶相須
傲他混濁同魚目
捫搏誰能識丈夫

飛蠅

尋頭撲面笑飛蠅
欲玷連城不自憎
逐臭營營惟附熱

天涯冷處失君能

遊鼠

啼殘丙夜集饑鼯
噉盡黃蘗覆粥盂
祇顧貪饕供一嚼

跳梁驚夢上人軀

聚蚊

結聚成團聲若雷
幾回撲散又飛來
芳名千載稱筋露
蒙難書生未足哀

鬼啾

沈沈殘柝夜蕭森似訴如悲動我心
三載為隣頻喚與
慈航度爾黑波深

疫癘

調變非關天意乖福基禍兆有根
芟明知瘴雨蠻煙地
多難多愁志未埋

碎衣

捉襟露肘道非貧憔悴支離已兩春
為憶機中麻苧婦
裁成白袷待歸人

破被

苦雨淒風捲地來摧殘弱質氣難回
老翁贈我黃花絮
一綫微陽撥凍灰

砂鍋

豆粥糝鹽何計為壁間土釜起寒炊
家居最慕調羹事
難裏聞韶味不知

泥爐

鎔成造化火初然泥竅中含數縷煙
一枕乍回猶未冷

五更霜重不成眠

瓦盆

朴陋堪追太古風
滿盛藜藿不愁空
行將攜此江南去
老作田間鼓缶翁

草褥

髀肉磨穿破薦痕
毳氍翡翠那堪論
卧薪待畢前生業
石上三生話宿根

敝履

天涯空憶馬蹄驕
芳草遲遲歸路遙
不逐世情輕敝屣
好留穩步廣陵橋

木枕

圓木牀頭卧不安
空煩授枕說邯鄲
此中若有光明隙
倚傍仙家去不難

篾筐

苜蓿盤殮只菜羹
愁中滋味亦香清
最嫌鼠輩空勞攘
筐筥如城莫視輕

竹刀

禁網繁苛獄吏嚴
竹刀切菜食無鹽
割雞製錦何曾試
信手如抽鄴架籤

草珠

恐慚衾影昧身修
廿載禁持過少留
不是餘生重佞佛
恰如瞻母望中求

油簋

赤帝初懸大火星
臨風避暑想荷亭
元規塵在誰為障

手撲粗紈也慣經

惡紙

紆籌脫稿惜無成欲寄牢騷慰此生十萬錦箋書不盡
殺青塗徧已三篇

臭墨

金精玉髓結深藍吞吐虹霓彩氣含猶是當年磨鐵手
如何此墨寸心甘

敗筆

偏師攻破五言城淪落羞誇筆陣兵定遠當年非浪擲
也因穎禿不堪擊

磚硯

案頭銅雀想朦朧滴露研珠墨氣鎔拋向亂軍何處覓
於今瓦礫伴耕農

殘書

卷軸芸香辟蠹魚半生鄭重幾行書亂來手澤輕如土
拋盡青緇痛有餘

炭痕

彪炳丹心千古垂
纔看煤跡淚頻揮
此情天地真堪老
報國憂民一首詩

塵灰

罡風吹動屋梁塵
席地千回拂拭新
暫學面牆存故我
不教蒙垢笑旁人

煙眯

昧旦寒灰燼復燃
不知門外日升天
迷離倦眼開難看

認作金爐裊篆烟

乞水

解渴思將蟹眼烹西鄰聞有轆轤聲強為顏笑從人乞
不負殷勤一勺情

覓火

閩南原係祝融城況復沈淪在火坑夜雨炊煙消歇盡
向人覓取作調羹

摘菜

不摘旁枝但剔泥青黃造出兩般齏三飧飽啖聊充腹
滋味深長莫漫提

執爨

煮菜烹茶豈憚艱三年習得面皮頑問他冷暖旁觀者
痛癢飢寒竟不關

食淡

鑄山煮海計千尋商算全操鹽似金淡味畧嘗天地闊
不留煩惱只行吟

縫綻

綵線金針教子心
素絲易染佩于今
臨行多少牽衣意
補綴年來淚滿巾

浣衣

滌垢除污說與誰
萬千艱瘁未嘗辭
洗來顏色還清白
勝入蓮花不染池

滌器

窮途阮籍一竿禪
笑傲安能免俗根
我欲臨流濯萬里

幾時白水可招魂

粉粥

陳蔡當年病絕糧
炎方今日亦空腸
一甌漫抵回生藥
始信農家麥飯香

餽飯

餽酸腐米氣流行
撒向庭階鳥不爭
耐取飢腸應有日
大官留饌待書生

柳茶

千泉泚水足山家
柏子初燃試紫芽
我愧盧仝耽此癖
難逢柳葉作新茶

劣酒

破囊羞澀一文無
斷酒三年腸已枯
昨夜老翁憐我病
沽來村釀未盈壺

缺藥

歡少愁多氣脈枯
病來藥餌欠贏餘
茂陵渴症年年發
說與文君總怒如

書傭

老兵出紙倩為書欲寄平安雙鯉魚聞道近來烽火急
從旁搦管也踟躇

醫匠

醫國空懷海上方順時調氣易周詳甦民自有清涼散
能起瘡痍菜色黃

蔽席

瘡痍繩樞尚白頭資身清蔭愧無謀三年遮得風多少

步障如斯暫免憂

糶桶

貯水煎茶買得來
需他完節合胚胎
補鍋糶桶皆遺老
藉手周旋有用才

糞草

暮暮朝朝積幾堆
箒篁縛帚掃難開
漫誇一簣能千仞
肯使污泥覆綠苔

穢廁

呼童蕩滌莫辭勤穢氣能招疫癘氛幾載浮沈同混濁
仗誰三沐復三薰

溺器

患難淪胥見世情裸裎氣味逼房楹向人穢褻曾無忌
蟲處禪中慢老成

惡夢

鄉國迷漫可奈何黃梁幻境日蹉跎至人清淨雖無夢
指點盧生心亦婆

元旦

嬌鳥初啼報早春
南冠羈客未騰身
凌晨覽鏡餘清淚
惟有寒霜白髮新

清明

風送啼鴉不斷聲
忍看春仲值清明
何時返里依宗祖
聊作東郊掃墓人

至日

愁懷萬斛鬱難開
誰向人間問劫灰
白日今朝添線影

履長全擬一陽回

除夕

千磨百折五般窮
瘴海沈淪類轉蓬
此夜悲涼家萬里
夢魂何處返飛鴻

撫棺

哭君共事怪君能
報德酬知惜未曾
只恐夜臺猶故態
悠悠泉路總寒冰

客俘

道路時時是楚冠流離老幼鼻為酸山僧未免充俘數
似我長羈分所安

老親

慈母親縫遊子衣臨歧囑付見幾微倚門淚眼糝糊望
鱸膾蓴羹美何日歸

昆弟

善養高堂學作家閒時培灌紫荊花更須敬嫂還憐姪
切莫輕提海水涯

憶內

叔水艱難藉辟纒不須裁剪寄征夫
買書勤與兒曹讀教子承顏善事姑

思兒

想到依依淚暗零汝冠諸弟尚髫齡
一經莫把韶華誤侍祖強於趨父庭

同宗

友愛同遵祖訓嚴留餘堂內戒心潛
英姿入夢心猶痛

彭澤歸來裝自廉

受業

千秋知己說歐蘇愧我才非金馬徒風雨雞鳴情至重
傷心隔世嘆先儒

同社

意氣相期河海深九峰初地結文林驪歌共灑臨岐淚
敢負垂髫金石心

故恩

鬢髮婆娑念老翁殷勤勉勵佩微躬分資餉母敦明發
報答瓊瑤奈困窮

舊遊


東泛金陵南會稽張帆舊約草萋迷長春宮裏閩王樹
滿地淒涼只鳥啼

祭墩

朝看暮守豈無靈也識勾羅斗與星雀角鼠牙收拾去
臨歧為爾薦香馨

告神

氣未飛揚足未高顛危心事付臯陶餘生自分酬知己
一任張羅困俊髦



抱犢山房集卷六